

平定兩金川方略

三

三

平定兩金川方略

卷一

三

平定兩金川方略卷之八十九

二月己丑。阿桂、色布騰巴爾珠爾奏言。查喇穆

喇穆山梁。爲賊番緊要門戶。今海蘭察之兵。已

繞過其左。佔據登古山梁。卽不難繞截喇穆喇

穆之後。但有登古對面高峯。驟難攻克。而其下

尙有可繞之路。若從此繞出。不但該處碉卡賊

難據守。而喇穆喇穆之賊。見大兵已越至險之

地亦必不攻自潰。惟此一帶山梁本係當噶爾
拉。功噶爾拉一脈。氣候亦相似。與明亮由馬奈
等處。沿河進兵者不同。數日來雨雪連綿。層冰
凍滑。官兵立脚爲難。但自登古對面高峯而下
不十餘里。卽出積雪之地。現在各官兵等。鑿冰
冒雪。搬石砍木。甚爲踴躍。以爲一過此隘。則地
勢漸平。天氣漸暖。勒烏圍賊巢在望。不難計日

掃平並不煩。臣等嚴加督飭。其凱立葉一路。臣

等斜望該山形勢較爲切近。詢之番人均稱有

路繞越不難措手。查有久經投出之金川番人

策旺伊生長凱立葉地方。路徑情形較爲熟悉

因令其前赴豐昇額軍營。以資嚮導。茲於二十

三日天色已晴。臣等卽於日內督率攻剿。

同日郝碩奏言。臣於本月十八日自大板昭馳

赴布朗郭宗。催趲糧運。查布朗郭宗。爲新設各站總滙之地。存米現有三千餘石。兼之每日滾運上站米石。並運送麵斤軍火餉鞘等項。積米未能暢運。且軍營積貯亦不甚充裕。設早晚直抵勒烏圍。愈進愈遠。更須添安數站。臣率同站員將後路捲撤之夫。截留三百餘名趕緊前運。又於本站雇募客夫。酌量加運。日來頗見踴躍。

火甚有憶。願加裝背負者。每日可運積米數百石。
旬日卽可運完。此後滾運之米。隨到隨運。不致
停積。均奏入。

上諭軍機大臣曰。前以阿桂從谷噶子口深入其後。
路最關緊要。復因豐昇額奏凱立葉一路。攻進稍
難。曾令其統兵赴谷噶一帶。爲阿桂助勦聲援。今
阿桂又遣熟識路徑久經投出之番人策旺前赴

豐昇額軍營以資嚮導。凱立葉既有路可繞。復添嚮導之人。自可乘間攻克。與阿桂會合進攻。但六七千里外軍務機宜。究難懸定。阿桂豐昇額惟當斟酌妥爲之。仍將作何定局之處。迅速覆奏。惟是數日以來。朕日夕盼望。竟至中夜無寐。將軍等豈可不體朕宵旰焦勞之意。嗣後間四五日。奏事一次。勿稍遲緩。又據郝碩奏抵布朗郭宗後。趕運軍

糧所辦甚好。人夫均知出力。趲運亦屬可嘉。郝傾等自應酌量加賞。以示鼓勵。

同日。

上諭內閣曰。阿桂等奏軍營出力人員。請將全福陞補貴州丹江營叅將。所遺貴州水城營遊擊員缺。以李煦補授。又四川城守營叅將員缺。請以劉興祖補授。其陝西潼關協副將員缺。現在綠營叅將

內不能得人。請以火器營翼長子爵仁和補授。均著照所請行。其委署防禦八十七索倫馬甲諾親保俱著授爲藍翎侍衛。仍著賞給八十七多訥馬克巴圖魯。諾親保資濟特巴圖魯名號。其貴州兵王安章。湖廣兵曹萬年俱着以千總補用。仍賞給王安章掖桑巴圖魯。曹萬年瓦爾單巴圖魯名號。均各加賞銀一百兩。

同日富勒渾奏言。

臣

於二十四日馳赴谷噶軍

營。與將軍阿桂籌商糧運及帶兵防駐事宜。據

稱大板昭實爲西北兩路糧運總滙。只須將大

板昭各卡隘防範周密。即可無虞。至僧格宗一

處。不過駐兵防守。與美諾布朗郭宗聲勢相連。

以通消息。實與各處後路無關。且目下大兵分

路會攻。該逆酋方固守不暇。何敢分兵滋擾。現

在擬卽進攻遜克爾宗。新設糧臺。正當趕運。一

經得手。卽可直抵勒烏圍。又須添安三四站。以

利軍行等語。

臣

查谷噶一路軍糧。經

臣

設法運

供。並無貽悞。昨劉秉恬已由孟拜拉前赴楸砥。

查看道路情形。郝碩亦前往布朗郭宗。催辦糧

運。

臣

現駐梭洛柏古地方。離大營三十里。督催

趕運。以裕軍儲。阿桂進攻遜克爾宗。一經克捷。

卽欲直抵勒烏圍一切增添臺站。均在賊酋境
內。後路軍糧。設有不繼。關係非輕。臣自當權其

輕重。暫駐梭洛柏古。相機妥辦。至新開楸砥色
利溝道路。據查禮稟稱。業已開通。修治寬整。其

中險仄之處。亦俱搭造編橋。計白楸砥至薩拉。

共安九站。比之北路由孟拜拉經行較近十二
站。卽比北路之咱嗎山。及西路之卧龍關。兩處

運道均近十站。所有糧米人夫馬匹各項。均可
節省十站之費。且係梭磨小金川地界。距賊甚
遠。尤爲穩妥。臣前准文綬來咨。將西路未經起
運商米改運湫砥一路。第恐道路初開。各商未
經親歷。不免觀望遲疑。臣現在咨商文綬。先飭

成華郾灌四縣。共辦長運大板昭米一萬石。剋
日起程。勒限到站。此項米石。絡繹而來。各商等

自必聞風嚮往。迨商民輻輳。糧運日增。而後路達木巴宗所剩米石。即可留爲布朗郭宗。美諾等處防兵支食。是舊存者旣無堆積之虞。新到者復有充盈之效。並可將布朗郭宗。至美諾一帶夫馬酌留。歸入各卡隘。以壯守禦之聲援。以絕賊番之窺伺。而其餘後路各站。均可裁撤。以歸節省。奏入。

上諭軍機大臣曰。前以阿桂軍營後路。關係緊要。因令富勒渾。仍隨阿桂大營。督辦一切。今富勒渾奏到籌辦糧務情形。是該督自不便輕離西路。至僧格宗爲南路扼要之處。卽着王進泰前往駐守。

同日。桂林奏言。

臣

督率各站員。上緊趕運南路

軍糧。今據糧員稟報。大營現存糧米。除運供奎林一路。及各山梁官兵支食外。已積有二千三

四百石。人夫約有一千三四百名。足敷分運其
換班人夫。陸續解到者。約有五百餘名。俱儘數
先撥大營應用。其續到之夫。卽照數截留。以補
從前撥調之數。旣可以資滾運。亦可免人夫往
返之煩。再查自章谷以至軍營。沿途路徑。多有
應用渡船之處。必須預添船隻。方可隨到隨渡。
所需工匠物料。以及應添水手。臣已核明數目。